



Dio zaplijenjenog oružja u Kozarskoj Dubici

SIPA pronašla naoružanje i vojnu opremu

Uhapšena je jedna osoba koja je privedena u prijedorsko tužilaštvo

Pripadnici Agencije za istrage i zaštitu BiH (SIPA) otkrili su veću količinu naoružanja i vojne opreme na području Kozarske Dubice i uhapsili jednu osobu kojoj se na teret stavlja da je počinila krivično djelo nedozvoljena proizvodnja i promet oružja ili eksplozivnih materija.

Postupajući po naredbi Osnovnog suda u Kozarskoj Dubici i Okružnog javnog tužilaštva Prijedor, policijski službenici SIPA su pretresli stambeni objekat na području Kozarske Dubice, gdje su pronašli i oduzeli 15 pušaka, šest ručnih bombi, pet pištolja različitog kalibra, devet optičkih

nišana za puške, tri kubure i jedan prigušivač, navode u Agenciji za istrage i zaštitu BiH.

Također, pronađeno je i oduzeto sedam bajoneta, 468 malokalibarskih metaka, 330 komada pištoljske municije, 1.180 komada puščane municije, jedan metak za broving, 21 komad sporogorećeg štapina i drugi predmeti koji mogu poslužiti kao dokaz u daljem postupku.

Aktivnosti su realizovane uz podršku policijskih službenika MUP-a Republike Srpske.

Kako saznajemo, akcija SIPA se i dalje nastavlja, a osumnjičeni je priveden na saslušanje. Naknadno će, navode u ovoj policijskoj agenciji, biti predat Tužilaštvu na dalje postupanje. Aktivnosti u okviru ovog predmeta intenzivno se nastavljaju s ciljem utvrđivanja svih činjenica i rasvjetljavanja krivičnog djela, navode u SIPA, te ističu da će predmet istrage, između ostalog, biti i to da se utvrdi gdje je i od koga osumnjičeni nabavio pronađeno oružje, kao i šta je namjeravao da učini sa njim. Nezvanično saznajemo da je osumnjičeni tokom saslušanja kazao da mu je nađeno oružje ostalo iz proteklog rata.

SIPA je, podsjetimo, prije nekoliko godina zaplijenila veću količinu oružja, streljiva i druge vojne opreme, namijenjene ilegalnom tržištu naoružanja, koje je krijumčareno na području BiH, Srbije i SR Njemačke. Ove godine Tužilaštvo BiH je podiglo optužnicu protiv Zorana i Srđana Rapića, Zorana Kresojevića i Mladena Karana zbog učešća u nedozvoljenom međunarodnom prometu oružja iz BiH u Švedsku. Oni se terete da su u drugoj polovini 2015. i početkom 2016. posredovali u međunarodnom prometu oružja, bez dozvole propisane zakonom BiH. **A. B. Č.**